

Reglur mannréttinda-, nýsköpunar- og lýðræðisráðs um styrkveitingar

1. gr.

Mannréttinda-, nýsköpunar- og lýðræðisráð Reykjavíkurborgar veitir ár hvert félagasamtökum, fyrirtækjum og einstaklingum styrki til starfsemi og þjónustu. Styrkirnir eru veittir í samræmi við reglur Reykjavíkurborgar um styrki og fjárveitingu sem ráðið ákveður í samræmi við fjárhagsramma sinn.

2. gr.

Markmiðið með styrkjum ráðsins er að styðja við hvers kyns sjálfsprottið starf á sviði mannréttinda og lýðræðis sem stuðlar að farsælli þróun borgarsamfélagsins, jafnræði borgarbúa, lýðræðisþátttöku og fjölbreytilegu mannlífi. Að sama skapi að styðja við hvers konar starf sem vekur athygli á eða stendur vörð um grundvallarréttindi borgarbúa. Styrkþegar geta verið frjáls félagasamtök, stofnanir og einstaklingar.

3. gr.

Styrkjum ráðsins er úthlutað einu sinni á ári og skal auglýst eftir almennum styrkumsóknum í september ár hvert. Úthlutun styrkja skal vera lokið innan þriggja mánaða frá auglýsingu.

4. gr.

Ráðið getur haldið eftir allt að 50% samþykkrar heildarupphæðar styrkja til að bregðast við umsóknum sem berast utan auglýsts umsóknartímabils, enda sé þá um að ræða umsóknir vegna atburða eða verkefna sem ekki var hægt að sjá fyrir eða skipuleggja í undanfara almennrar styrkjaúthlutunar. Nánar er kveðið á um meðferð styrkumsókna sem berast utan auglýsts umsóknartímabils í reglum ráðsins um skyndistyrki. Mannréttinda-, nýsköpunar- og lýðræðisráð úthlutar jafnframt ár hvert mannréttindaverðlaunum Reykjavíkurborgar og er sú upphæð allt að 5% af styrkjafé ráðsins. Nánar er kveðið á um þá úthlutun í sérstökum vinnureglum um mannréttindaverðlaun Reykjavíkurborgar.

5. gr.

Við styrkveitingar skal miða við að umsóknir falli undir eftirtalin skilyrði:

- a. Að verkefni, starfsemi eða viðburðir falli að markmiðum styrkja mannréttinda-, nýsköpunar- og lýðræðisráðs, sbr. 2. gr. þessara reglna.
- b. Að verkefni, starfsemi eða viðburðir falli að öðru leyti að markmiðum stefnumótunar Reykjavíkurborgar í mannréttinda- og lýðræðismálum.
- c. Að verkefni eða starfsemi falli ekki undir hefðbundinn rekstur, s.s. laun starfsfólks, daglegan rekstur skrifstofu eða húsnæðis.
- d. Að umsóknir uppfylli kröfur settar fram í almennum styrkjareglum Reykjavíkurborgar.

6. gr.

Þeir aðilar sem njóta styrkja frá mannréttinda-, nýsköpunar- og lýðræðisráði skulu láta þess getið við kynningu á þeim verkefnum, starfsemi eða viðburði sem hefur hlotið styrk. Á sama hátt skulu styrkþegar láta styrksins getið í hvers kyns útgáfu í tengslum við viðkomandi verkefni, starfsemi eða viðburð.

7. gr.

Styrkþegar skulu skila greinargerð til mannréttinda-, nýsköpunar- og lýðræðisráðs innan árs frá því að styrkur var veittur þar sem greint er frá því hvernig styrkfé hefur verið varið. Félagasamtök eða stofnanir sem fá yfir eina milljón króna í styrki skulu skila til mannréttinda-, nýsköpunar- og lýðræðisráðs árituðum ársreikningi fyrir það starfsár sem styrkurinn var veittur ásamt endanlegu fjárhagsuppgjöri þess verkefnis sem styrkt var. Einstaklingar sem fá yfir eina milljón króna í styrki skulu skila endanlegu fjárhagsuppgjöri að verkefni loknu. Styrkþegum er skylt að skrifa undir samning við mannréttindaskrifstofu áður en styrkur er greiddur. Styrkir yfir eina milljón skulu greiddast í tvennu lagi, við upphaf verkefnis og við verklok.

8. gr.

Styrkþegar skulu vera reiðubúnir til að flytja einn fyrirlestur eða kynningu á því verkefni sem styrkt er á málþingi eða ráðstefnu sem mannréttinda-, nýsköpunar- og lýðræðisráð boðar til, án sérstakrar þóknunar af því tilefni.

9. gr.

Styrkumsóknir eru lagðar fyrir mannréttinda-, nýsköpunar- og lýðræðisráð til meðferðar ásamt umsögn mannréttinda- lýðræðisskrifstofu þar sem lagt er faglegt mat á hvernig skilyrði til styrkveitinga eru uppfyllt skv. 5. grein þessara reglna. Að öðru leyti fer meðferð, afgreiðsla og málsmeðferð umsókna eftir almennum reglum um styrkjastefnu Reykjavíkurborgar sem borgarráð samþykkir.

Samþykkt á fundi mannréttinda- og lýðræðisráðs 11. apríl 2019.